



Komunikadu Imprensa
08 Marsu 2019

Timor Leste komemora Loron Internasionál ba Feto: Hanoi hanesan, harii ho matenek, halo inovasaun ba mudansa

Iha 8 Marsu 2019, Timor-Leste selebra Loron Internasionál ba Feto nu'udar loron importante hodi fó rekoñesimentu no dignifika kontribuisaun feto Timor-Leste no feto iha rai seluk atu promove igualdade, respeita no asegura feto sira nia direitu sein halo diskriminasaun no violénsia hasoru feto. Tema ba loron mundiál feto tinan ida ne'e mak **“Hanoi hanesan, harii ho matenek, halo inovasaun ba mudansa.”**

“JSMP fiar katak ho tema ne'e sei enfazé liután esforsu sira ne'ebé durante ne'e halo ona atu promove mudansa ba feto sira nia partisipasaun no movimentu sosiál sira ba mudansa iha sosiedade, maibé estadu prezisa kria mekanismu ka politika ida-ne'e klaru no rigorizu atu kombate violénsia hasoru feto iha sosiedade,” dehan Diretór Ezekutivu JSMP, Luis de Oliveira Sampaio.

Istória luta ba igualdade jéneru no partisipasaun fetó iha Timor-Leste ne'e úniku, partikularmente desde iha tempu okupasaun no feto iha era ukun-rasik an. Iha tempu okupasaun feto barak fó nia vida no sofre violénsia oioin atu salva sira ninia membru familia (laen, aman ka maun-alin sira) hosi persegisaun militar tanba sira nia atividade politika ba prosesu luta ba kauza libertasaun nasional. Balun sofre tanba lakon sira nia membru familia, balun seluk hetan violasaun seksuál hanesan kompensasaun ba sira nia laen ka maun alin sira nia atividade política kontra okupasaun, hetan torturasaun no violénsia estruktural sira seluk. Feto hirak ne'e balun kontinua sofre psikolojikamente to'o ohin loron tanba trauma no la iha mekanismu propriu ne'ebé bele fasilita prosesu rehabilitasaun ida-ne'ebé adekuadu ba sira.

Istória violéncia hasoru feto kontinua eziste iha era ukun rasik an, embora iha forma no karakter ne'ebé la hanesan no violéncia hirak-ne'e nu'udar asuntu krítiku ba feto no feto-ran sira iha Timor-Leste.

Estudu sira hatudu ona katak feto barak mak sofre violéncia bazeia ba jeneru, iha forma oioin ne'ebé seriu hanesan violéncia doméstika, abandonu, violasaun seksuál, ate balun lakon sira nia vida tanba kauza hosi violéncia doméstika. Partikularmente ba violasaun seksuál hasoru feto, iha estudu ida ne'ebé halo hosi Fundasaun Azia (The Asia Foundation) iha tinan 2015, hatudu katak feto pursentu 34 ho idade tinan 15-49 iha esperiéncia ba violéncia seksuál durante sira nia moris. Porsentu 41 (41%) hetan esperiéncia hosi sira nia parseiru intimu, no pursentu 14 hetan violasaun seksuál hosi ema ne'ebé la'os sira nia parseriu íntimu.

Iha tinan 2018 JSMP monitoriza totál kazu hamutuk 1036 no hosi kazu ne'e iha kazu 652 (63%) envolve violéncia bazeia ba jéneru no iha kazu 553 (79%) envolve violéncia doméstika no restu envolve tipu krime sira seluk.

Situasaun ne'e la-to'o ba ne'e de'it, feto sira mós hasoru dezafiu estruturál oioin relasiona prosesu atu asesu ba justisa formal bainhira violéncia hasoru sira. Dalaruma vítima sira la halo denúnsia ba kazu violéncia hirak-ne'e tanba razaun lubuk ida. Purzemplu sira hetan presau hosi sira nia família atu rezolve problema ne'e liuhosi família, preukupa ho estigmatizasaun sosiál, falta koñesementu kona-ba sistema justisa formal, no persepsaun katak violéncia ne'ebé akontese iha uma-laran ne'e nu'udar problema uma-laran. Bainhira sistema legál falla atu kondena arguidu no fó justisa ba vítima, ida-ne'e impede liutan vítima sira atu buka reparasaun através hosi sistema justisa formal.

Politikamente Estadu introdús iniciativa oioin kona-ba promosaun igualidade jéneru no kombate violéncia bazeia ba jéneru, maibé política no iniciativa hirak-ne'e seidak bele rezolve problema kona-ba violéncia

hasoru feto hanesan dados sira ne'ebé JSMP deskobre atraves hosi monitorizasaun sira iha tribunál.

JSMP hein katak komemorasaun lora internasionál ba feto, ema hotu-hotu liuliu instituisaun estadu sira sei halo esforsu hotu ne'ebé posivel hodi halakon violénsia hasoru feto. Konkretamente JSMP rekomenda atu estadu bele halo kampaña másivu no extensivu promove politika toléransia zero ba violénsia hasoru feto.

Aproveita momentu importante ida-ne'e JSMP hakaak kongratula feto hotu iha mundu liuliu feto Timor-Leste ne'ebé mak sakrifika sira-nia an hodi proteje feto nia direitu no lori mudansa signifikante ba feto sira.

Atu hetan informasaun liutan bele kontaktu ba:

Luis de Oliveira Sampaio

Diretór Ezekutivu JSMP

Email : luis@jsmp.tl

Website : www.jsmp.tl